



ATASSUT
Steen Lyngé

UPA2015/20-1
21.04.2015.

Utoqqalinersiaqartut qanigisaannik toqusoqartillugu Kalaallit Nunaanni ilisiartornissamut ukiumut ataasiarlutik pisortanit akiliunneqartalernissaat isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Nikolaj Jeremiassen, Siumut)

Utoqqalinersiaqartut qanigisaannik toqusoqartillugu Kalaallit Nunaanni ilisiartornissamut ukiumut ataasiarlutik pisortanit akiliunneqarlutik ilisiartorsinnaalernissaannik Siumut sinnerlugu Inatsisartuni ilaasortaq Nikolaj Jeremiassen matumani siunnersuuteqarpoq.

Ukiuni nutaanerusuni nunatsinni najugaqariaaserput amerlasuutigut ilaqutariinnut, qangaanerusoq ataatsimoornermik annertuumik aallaaveqarsimasumut sanilliullugu, allaanerulluinnarpoq.

Ilaqutariimmi nunatsinni inoqarfinnut nunassaminnik toqqaasarnerat amerlasuutigut ilaqutariit nunaqqatigiinnatik imminnut ungasillutik najugaqartiternerulernikummata, tamatumalu malitsigisai, pingaartumik qanigisaasumik toqusoqarsimatillugu ilaqutariinnut unammillernartumik inissisimalersitsisarput.

Taamatut nalaataqartoqaraangat, pingaartumik aningaasatigut pisinnaasat killeqarsimatillugit, ilaqutariit, matumani pingaartumik utoqqaat kinguaaminnik annaasaqarlutik naggammik qaniuerusukkaluarlutik iliuusissaaleqilersarnerat imaannaasimanavianngitsoq ATASSUT-mit takorloorsinnaavarput, taamaammat utoqqaat taamatut nalaataqartut oqilisaanneqarnissaannik siunnersuuteqartup siunertaa tunngaviusumik paasilluarsinnaavarput, qujavugullu pisortat utoqqartatsinnut isumassuinerunissaannik matumani ujartuimmat.

Ilaqutariit innuttaasullu ataasiakkaat qanoq pisortanit periarfissaqartitaassanersut aammalu qanoq namminneq sapinngisamik annerpaamik imminnut periarfissarsiuutissanersut siunnersuuteqartup eqqarsalertippaatigut.



Uagummi ATASSUT-mi tunngaviumik pingaartipparput innuttaasut pisortanut pituttorsimanerat annikillisarneqassasoq aammalu kiffaangissuseqarlutik inuuneqarluarnissaminnut periarfissaat annertusarneqartuassasut, matumanilu pisortanut pituttorsimanerup annerulersinneqarnissaanik ugartuisoqartoq oqaatigineqarsinnaavoq.

Taamaattorli pisortat inuppalaassusermik innuttaasunut pissuseqarnissaannik aamma pingaartitsisuuvugut, taamaammat uagutsinnut ajornaatsuinnaangilaq inuiaqatigiittut killiffitsinni siunnersuut qanoq isummerfigissanerlugu.

ATASSUT-mit siunnersuut manna nalilersortillutigu Kalaallit Nunatsinni Illerfissarsiutileqatigiit ukiorpassuarni nersortarialimmik qimagaasunullu oqilisaataaqisumik sulisimanerat sulilu sulinerat ilanngullugu eqqaavarput, qujamasoqaagullu innuttaasut namminneerlutik, pisortanik annertunerusumik isumalluuteqanngikkaluarlutik, nersortarialimmik taamatut qasusuillutik suliniuteqarnermikkut annertuumik oqilisaassisarmata.

Siunnersuummut atatillugu ATASSUT-mit kaammattuutigisinnaasarput tassaavoq misissorneqarsinnaasoq ilaqutariit pisussaaffigassaminnik siunertamut taarsigassaminnik pisortanut qinnuteqarsinnaanerannut periarfissaat utoqqaat qanigisaminnik toqusoqarsimatillugu naggammik qaniuiartorsinnaanerat ullumikkumit pitsaanagerusumik periarfissarsiorneqarsinnaanersoq.

Taamatut oqaaseqarluta siunnersuutip siunertaa qanillattorniarlugu misissuisoqarsinnaanera siunertaralugu ATASSUT-mit kaammattuutigissavarput siunnersuut aappassaaneerneqartinnagu ataatsimiititaliami susassaqartumi suliarineqassasoq.